

四庫全書

經部

欽定四庫全書


讀禮通考卷九十八

刑部尚書徐乾學撰

喪具四

碑

碑石為之鄭氏釋聘禮曰設碑近如堂深



陳氏禮書本

檀弓公肩假曰夫魯有初公室視豐碑三家視桓楹

初注

謂故事豐碑斷大木為之形如石碑於搏前後四角樹之穿中於間為鹿盧下棺以緯繞天子六緯四碑前後各重鹿盧也言視豐碑者時公室僭天子也三家時僭諸侯諸侯下天子斷之形如大楹耳四植謂之桓諸侯四緯二碑碑如桓矣疏儀禮廟庭有碑故祭義云牲入麗于碑儀禮每云當碑揖今謂用大木為碑穿鑿去碑中之木令使空於此空間著鹿盧鹿盧兩頭各入碑末緯即緯也以緯之一頭繫棺緘以一頭繞鹿盧既訖而人各背碑負緯末頭聽鼓聲以漸却行而下之也春秋天子有隧以羨道下棺所以用碑者凡天子之葬掘地以為方壙漢書謂之方中又方中之內先累搏於方中南畔為羨道以蜃車載柩至壙說而載以龍輶從羨道而入至方中乃屬緯于棺之緘從上而下棺入于搏之中於此之時用碑緯也三家言視桓楹不云碑知不

似碑形故云如大樞耳案說文桓亭郵表也謂亭郵所
立表木即今之橋旁表柱也通而言之亦謂之碑故喪
大記云諸侯
大夫二碑也

釋名碑被也此本王莽時所設也施其轆轤貫繩其
上以引棺也臣子近述君父之功美以書其上後人
因焉故或建於道陌之頭顯見之處名其文就謂之
碑也

後漢書中平四年陳寔卒大將軍何進遣使弔祭海內
赴者三萬餘人制哀經者以百數共刊石立碑謚為文

範先生

郭泰卒同志者共刻石立碑蔡邕為文既而謂涿郡盧植曰吾為碑銘多矣皆有慚德唯於郭有道無媿色耳
摯虞文章流別論古有宗廟之碑後世立碑於墓顯
之衢路其所載者銘辭也

宋書晉武帝咸寧四年詔曰石獸碑表既私褒美興長
虛偽傷財害人莫大於此一禁斷之其犯者雖會赦令
皆當毀壞

漢以後天下送死奢靡多作石室石獸碑銘等物建安
十年魏武帝以天下彫弊下令不得厚葬又禁立碑魏
甘露二年大將軍參軍王倫卒倫兄俊作表德論以述
倫遺美云祇畏王典不得為銘乃撰錄行事就刊於墓
之陰云爾此則碑禁尚嚴也此後復弛替

劉勰文心雕龍碑者埤也上古帝王始號封禪樹石
埤岳故曰碑也周穆紀迹於弇山之石亦石碑之意
也又宗廟有碑樹之兩楹事止麗牲未勒勲績而庸

器漸闕故後代用碑以石代金同乎不朽自廟徂墳
猶封墓也自後漢以來碑碣雲起才鋒所斷莫高蔡
邕觀楊賜之碑骨鯁訓典陳郭二文句無擇言周乎
衆碑莫非清允其叙事也諛而要其綴采也雅而澤
清詞轉而不窮巧義出而卓立察其為才自然而至
孔融所創有慕伯喈張陳兩文辨給足采亦其亞也
及孫綽為文志在碑誄溫王邵庾辭多枝雜桓彝一
篇最為辨裁夫屬碑之體資乎史才其序則傳其文

則銘標序盛德必見清風之華昭紀鴻懿必見峻偉
之烈此碑之制也夫碑實銘器銘實碑文因器立名
事光於誄是以勒石讚勲者入銘之域樹碑述已者
同誄之區焉

隋書三品以上立碑螭首龜趺上高不過九尺

唐會要五品以上立碑

封演見聞記墓前碑碣未詳所起案儀禮廟中有碑
所以繫牲并視日景禮記公室視豐碑三家桓楹天

子諸侯葬時下棺之柱其上有孔以貫緯索懸棺而下取其安審事畢因閉壙中臣子或書君父勲伐於碑上後又立之於隧口故謂之神道言神靈之道也古碑上往往有孔是貫緯索之像前漢碑甚少後漢碑蔡邕崔瑗之徒多為人立碑魏晉之後其流寢盛隋氏制五品以上立碑螭頭龜趺上不得過四尺載在喪葬令近代碑稍衆有力之家多輦金帛以祈作者雖人子罔極之心順情虛飾遂成風俗蔡邕云

吾為人作碑多矣唯有道無媿詞隋文帝子齊王攸薨僚佐請立碑帝曰欲求名一卷史書足矣若不能徒為後鎮石耳誠哉是言也

陸龜蒙笠澤叢書碑悲也古有懸而窆用木書之以表其功德因留之不忍去碑之名由是而得自秦漢以降生有功德政事者亦碑之而又易之以石失其稱矣此亦德政有碑之起也陸法言廣韻曰碑碣李斯造宜始於嶧山之刻

尚書故實古碑皆有圓孔蓋碑者悲也本墟墓間物每墓有四初葬穿繩於孔以下棺乃古懸窆之禮後世德政碑亦作圓孔不知根本甚矣

陳祥道禮書公食大夫禮庶羞陳于碑內庭實陳于碑外燕禮賓自碑內聽命聘禮醢醢百甕夾碑十分以為列賓自碑內聽命祭義曰君牽牲入廟門麗于碑士昏禮賓入廟門鄉飲酒賓入庠門鄉射賓入序門皆三揖至于階而三揖之中有當碑揖則諸侯大

夫士之宮皆有碑矣鄭氏曰宮必有碑所以識日景引陰陽也凡碑引物者宗廟則麗牲焉其材宮室以石寔用木禮天子之寔豐碑諸侯桓楹大夫二碑士無碑魯之季也公室視豐碑三家視桓楹寔碑如桓楹則宮室碑制可知

張師正倦遊錄前漢碑極少魏晉之後其流寔盛李北海以此得潤筆金帛駢羅皆是諛墓之物韓退之亦不免焉本朝唯東坡獨能守之所作司馬公范蜀

公等六碑耳

孫宗鑑雜錄禮注曰宮必有碑所以識日景禮記祭義曰君牽牲既入廟門麗于碑麗者猶繫也以之繫牲則必有穿矣檀弓曰公室視豐碑三家視桓楹說者曰斲大木為之形如石碑於樽前後四角樹之穿中間為轆轤下棺以絳繞天子六絳四碑諸侯四絳二碑大夫二絳無碑蓋古葬唯王者有隧諸侯皆懸棺而下晉文公請隧勿許曰王章也未有代德而有

二王亦叔父所惡也自周衰戰國秦漢皆以碑懸棺或以木或以石既葬碑留壙中不復出矣其後稍書姓名爵里其上至後漢遂作文字款識矣今人掘地得古碑而有竅者非麗牲之碑則下棺之碑也

唐陵皆無碑記唯乾陵西南隅有大碑高三十餘尺螭首龜趺巋然表裏無一字亦不知其何謂而立

宋祁筆記碑者施於墓則下棺施於廟則繫牲古人因刻文其上

張表臣珊瑚鉤詩話碑者披列事功而載之金石也
孫何碑解進士鮑源以文見借有碑二十首與之語
頗熟東漢李唐之故事惜其安於所習猶有未變乎
俗尚者作碑解以貺之碑非文章之名也蓋後人假
以載其銘耳銘之不能盡者復前之以序而編錄者
通謂之文斯失矣陸機曰碑披文而相質則本末無
據焉銘之所始蓋始於論撰祖考稱述器用因其鑄
刻而垂乎鑒誠也銘之於嘉量者曰量銘斯可也謂

其文為量不可也銘之於景鐘曰鐘銘斯可矣謂其
文為鐘不可也銘之於廟鼎者曰鼎銘斯可矣謂其
文為鼎不可也古者盤孟几杖皆有銘就而稱之曰
盤銘孟銘几銘杖銘則庶幾乎正若指其文曰盤曰
孟曰几曰杖則三尺童子皆將笑之今人之為碑亦
猶是矣天下皆踵乎失故衆不知其非也蔡邕有黃
鉞銘不謂其文為黃鉞也崔瑗有座右銘不謂其文
為座右也擅弓曰公室視豐碑三家視桓楹釋者曰

豐碑斲大木為之桓楹者形如大楹耳四植謂之桓喪大記曰君葬四綽二碑大夫葬二綽二碑又曰凡封用綽去碑釋者曰碑桓楹也樹之於壙之前後以紼繞之間之轆轤輓棺而下之用綽去碑者縱下之時也祭義曰祭之日君牽牲既入廟門麗于碑釋者曰麗繫也謂牽牲入廟繫著中庭碑也或曰以剡貫碑中也聘禮曰賓自碑內聽命又曰東面北上碑南釋者曰宮必有碑所以識日景引陰陽也考是四說

則古之所謂碑者乃葬祭饗聘之際所植一大木耳
而其字從石者將取其堅且久乎然未聞勒銘於上
者也今喪葬令其螭首龜趺洎丈尺品秩之制又易
之以石者後儒所增耳堯舜夏商周之盛六經所載
皆無刻石之事管子稱無懷氏封泰山刻石紀功者
出自寓言不足傳信又世稱周宣王蒐于岐陽命從
臣刻石今謂之石鼓或曰獵碣洎延陵墓表俚俗目
為夫子十字碑者其事皆不經見吾無取焉司馬遷

著始皇本紀著其登嶧山上會稽甚詳止言刻石頌
德或曰立石紀頌亦無勒碑之說今或謂之嶧山碑
者乃野人之言耳漢班固有泗水亭長碑文蔡邕有
郭有道陳太丘碑文其文皆有序冠篇末則亂之以
銘未嘗斥碑之材而為文章之名也彼士衡未知何
從而得之由魏而下迄乎李唐立碑者不可勝數大
抵皆約班蔡而為者也雖失聖人述作之意然猶髣
髴乎古迨李翱為高懸女碑羅隱為三叔碑梅先生

碑則所謂序與銘皆混而不分集列其目亦不復曰
文考其實又未嘗勒之於石是直以繞紉麗牲之具
而名其文戾孰甚焉復古之事不當如此貽誤千載
職機之由今之人為文揄揚前哲謂之贊可也警策
官守謂之箴可也鍼砭史闕謂之論可也辯析政事
謂之議可也裸獻宗廟謂之頌可也陶冶性情謂之
歌詩可也何必區區於不經之題而專以碑為也設
若依違時尚不欲全拂乎諛諛者則如班蔡之作存

序與銘通謂之文亦其次也夫子曰必也正名乎又曰名不正則言不順君子之於名不可斯須而不正也況歷代之誤終身之惑可不革乎何始寓家於潁以涉道猶淺嘗適野見荀陳古碑數四皆穴其上若貫索之為者走而問故起居郎張公觀公曰此無足異也蓋漢寶去聖未遠猶有古豐碑之象耳後之碑則不然矣五載前接柳先生仲塗仲塗又具道前事適與何合且大噱昔人之好為碑者久欲發揮其說

以詒同志自念資望至淺未必能見信於人又近世
多以是作相高而夸為大言苟從而明之則謗將叢
起故蓄之而不發以生力古嗜學偶泥於衆好其兄
又於何為進士同年故為生一二而辯之噫古今之
疑文章之失尚有大於此者甚衆吾徒樂因循而憚
改作多謂其事之故然生第勉而思之則所得不獨
在於碑矣

事祖廣記管子曰無懷氏封泰山刻石紀功秦漢以

來始謂刻石曰碑蓋因喪禮豐碑之制也刻石當以
無懷為始而名焉自秦漢也古之葬有豐碑以定
秦漢以來死有功業生有德政者皆碑之稍改用石
因總謂之碑

朱子語類古人唯冢廟有碑廟中者以繫牲冢上四
角四碑以繫索下棺棺既下則埋於四角所謂豐碑
也或因而刻字於其上後人凡碑則無不刻之且於
中間刻孔不知何用今會稽大禹廟有一碑下廣而

上小不方不圓尚用以繫牲云是當時葬禹之物上有隸字蓋後人刻之也

黃公紹韻會舉要碑說文豎石紀功德從石卑聲徐曰案古宗廟立碑以繫牲耳後人因于其上紀功德此碑字從石秦以來制也七十二家封禪勒石不言碑七十二家封禪之言始於管仲不言碑穆天子傳乃為名迹於弇茲石上亦不言碑也銘勒功德當始於宗廟麗牲之碑也祭義言麗于碑士昏禮聘禮入

門當碑揖則大夫士廟內皆有碑鄉飲酒鄉射三揖
注云三揖者將進揖當陳揖當碑揖則庠序之內皆
有碑碑所以識日景觀碑景邪正以知蚤晚宮廟用
石為之葬碑取懸繩緯暫時往來運載當用木而已
又釋名云碑被也葬時所設臣子追述君父之功以
書其上徐曰劉熙言起於懸棺之碑者蓋今神道碑
也初學記碑悲也所以悲往事今人墓隧宮室之事
通謂之碑矣

潘昂霄金石例碑文皆須實錄不得濫有褒飾立碑
二品以上高不得過一丈二尺五品以上高不得過
九尺墓碑無銘詞刻墓前石柱上亦有刻在碑上
者

明集禮五品以上許立碑

唐錦夢餘錄古之所謂碑者乃葬祭之時植一大木
用以繞紉麗牲耳不可為文章之名也後世易之以
石已失古制孫何嘗著論辨之然有名公鉅儒為人

作碑文而徃往直書其首曰某公神道碑是皆考索不精恐不免見笑於孫公矣

明太祖實錄碑碣功臣沒後封王螭首高三尺二寸碑
身高九尺闊三尺六寸龜趺高三尺八寸一品螭首高
三尺碑身高八尺五寸闊三尺四寸龜趺高三尺六寸
二品蓋用麟鳳高二尺八寸碑身高八尺闊三尺二寸
龜趺高三尺四寸三品蓋用天祿辟邪高二尺六寸碑
身高七尺五寸闊三尺龜趺高三尺二寸四品圓首高

二尺四寸碑身高七尺闊二尺八寸方趺高三尺五品
圓首高二尺二寸碑身高六尺五寸闊二尺六寸方趺
高二尺八寸六品圓首高二尺碑身高六尺闊二尺四
寸方趺高二尺六寸七品圓首高一尺八寸碑身高五
尺五寸闊二尺二寸方趺高二尺四寸

神道碑

事祖廣記晉宋之世始又有神道碑天子及諸侯皆

有之

其刻未止曰某帝或某官神道之碑今世尚有宋文帝神道碑墨本也其初由立之於葬兆之

東南地理家以東南為神道故以名碑兩案後漢中山簡王薨詔為之修冢塋開神道注云墓前開道建石柱以為標謂之神道是則神道之名在漢已有之也晉宋之後易以碑刻云

集古錄宋文帝神道碑題曰太祖文皇帝之神道八大字而別無文辭惟以此為表識古人刻碑正當如此而後世鐫刻功德爵里世系唯恐不詳然自後漢以來門生故吏多相與立碑頌德矣予家集古所錄三代以來鐘鼎彝盤銘刻備有至後漢以後始有碑文欲求前漢時碑碣卒不可得是則冢墓碑自後漢

以來始有也

乾學案霍光瑩築神道蜀郡太守王稚子太尉劉文饒並有神道非始於後漢晉宋之世蓋自漢以後一命而上稍有聲績者其沒也無不立碑著神道與闕亦不論官階其式多不相同有暈有穿暈或三四重而穿則一首跌兩旁或刻人物麒麟龜龍及諸圭璧珍寶之形窮工極巧以為厚終之禮如是方可慰

門生故吏及其子孫無窮之思而不知汰已甚矣建安時之為制禁也宜哉

吳曾能改齋漫錄葬者墓道稱神道自漢已然引襄陽耆舊傳光武立蘇嶺祠刻二石鹿於神道楊震碑首題太尉楊公神道碑銘為證非也漢書高惠文功臣表成國侯季信成坐為太常縱丞相侵神道為隸臣霍光傳光薨光夫人侈大其塋制起三山闕築神道此二事皆在前當以為據蓋不始於後漢但表所

謂神道疑宗廟之路也

隸釋交趾都尉沈君二神道其上各刻朱雀其形相
向知此蓋是一人猶王稚子闕盡書其所歷官也其
下又刻龜蛇虎首所畫最工此字及馮煥王稚子闕
皆是八分書

程大昌演繁露李廣傳丞相李蔡得賜冢地盜取三
頃賣之又盜取神道外壩地一畝葬其中世之言神
道者始此又霍光塋起三土闕築神道神道言神行

之道也

寶刻叢編漢蜀郡屬國都尉王君神道在南陽題云
漢故蜀郡屬國都尉王君神道封陌案酈道元注水
經涪水南道側有二石樓制作精妙題云蜀郡太守
姓王字稚子南陽西鄢人

漢太尉劉寬神道有二其一曰漢太尉劉公諱寬字
文饒其一曰漢太尉車騎將軍特進昭烈侯劉公神
道各有一螭蟠屈乎其上而下作獸面如犴鼎間饗

餐之象當是雙闕所刻圖畫微拙不及王稚子沈新
豐之精也

訪碑錄鄧城縣南十二里張相公墓前有大周魏君
之神道字

六朝事迹梁吳平忠侯蕭景墓石柱一題云梁故侍
中中撫將軍開府儀同三司吳平忠侯蕭公之神道
梁安成王蕭秀墓石柱一及神道碑二題云梁故
散騎常侍司空安成康王之神道 梁臨川王蕭宏

墓石柱碑二題云梁故史黃鉞侍中大將軍揚州牧
臨川靖惠王之神道 梁建安侯蕭正立墓有石柱

二題云梁故侍中左衛將軍建安敏侯之神道

金石例三品以上神道碑立於墓隧道之左面南立

螭首龜趺各依品從合得尺寸

見儀制今更欲
檢之此未盡也

王行墓銘舉例案神道碑其題有二有碑額之題有
碑文之題碑額之題簡碑文之題詳蓋既題其額又
題其文也

凡神道碑首必詳書其世系重其所出也

陳龍正家矩唐宋大臣例有神道碑大都奉朝命而為之亦有其家私求撰述者然古來德行勲業流傳不朽浸灌人心大抵史冊所記載後賢所表章何嘗讀某家碑誌是則德業果盛既不必求苟無德業求又何用人唯有自立於生前寧須借重於死後儻祖先有隱德微情足以感動後世子孫中推一有文采筆力者為質實記之或有及門諸子互記而彙輯之

如年譜之屬用志不忘可也

先塋碑

金石例先塋先德昭先等碑唐宋皆無之所書三代并妻子例似與神道墓誌等碑不同

濟南李昌道作李千戶先塋碑不書李千戶之妻某氏只寫子幾人其妻怒昌道言婦人未終如何敢書

魏叔子曰當考古金石例至金元之間而始有先塋昭德之碑蓋倣唐人先廟之文而為之者也用以紀追命表先德莫此為宜然而讀其文往往多頌而寡志畧死而諛生君子譏焉

御製碑

任昉文章緣起四皓有羽翼太子之功其沒也惠帝
為之製文立碑

東觀漢記竇章女年十二能屬文以才貌選掖庭有
寵與梁皇后並為貴人蚤卒帝追思之詔史官樹碑
頌德帝自為之辭

唐書魏徵傳徵薨陪葬昭陵帝作文於碑遂書之

王定保摭言文貞公神道碑太宗之文時徵將薨太

宗夢見之及覺左右奏徵卒故曰俄於髣髴忽覩形儀復曰高宗昔日得賢相於夢中朕今此宵失良臣於覺後

唐書張說傳說卒帝為製碑

宋次道春明退朝錄唐太宗自撰魏元成碑德宗亦撰段秀實碑本朝太宗撰中令趙公碑

御書碑

唐書韓思復卒天子親題其碑曰有唐忠孝韓長山之

墓

盧懷慎卒帝經其墓碑表未立停蹕臨視泣然流涕詔
官為立碑令中書侍郎蘇頲為文帝自書之

張說嘗自為其父碑帝為書其額曰嗚呼積善之墓
郭知運卒帝詔中書令張說紀其功於墓碑

春明退朝錄皇祐中王侍郎融守河中還乃以唐明

皇所題裴耀卿碑額上之仁宗遂御篆沂公碑曰旌

賢其後踵之者懷忠

呂許公

顯忠

李忠武

旌忠

寇萊公

全德

元老

王太尉

教忠積慶

文潞公父洎

親賢

李侍中用和

寢親

齊國獻穆

公旌功

曹襄悼

舊學

晏元獻

崇儒

丁文簡

顯先積慶

趙中令子塋

旌忠懷德

張侍中書

儒賢

高文莊

褒賢

范文正

思賢

劉丞相

清

缺

王武恭

旌忠元勲

狄武襄

褒忠

陳恭公

純孝

張文孝

忠規德範

宋元憲英宗御篆

淳德守正

呂文穆公

大儒元老

賈魏公

碑額 趺

六朝事迹齊獻武公墓在棲霞寺側有碑額曰齊故侍中尚書令丞相巴東獻公之墓

隸釋益州太守碑以朱爵為額龜蛇為趺龍虎銜璧
在其兩旁

漢泰山都尉孔君之碑凡漢刊其首行即入辭無額
者或題其前如張納樊安之比亦甚少已篆其上復
標其端唯此碑爾

漢是邦雄傑碑無名碑以天祿為額其下刻一牛首
又有碑上朱雀而下玄武其中則沒字碑也此碑之
文曰是邦峻生雄傑峻之上下各闕一字

呂祖謙文集銘誌既有題額更不當復寫某官墓誌
便當從頭直開誌文而銘銜則列於銘後乃為得體
金石例書碑額例真字八分書謂之題額篆字則云
篆額

碑陰

隸釋孔宙碑陰有門生故吏名漢碑多有陰然稀少
有額獨此刻以五大篆表其上

益州太守碑陰有牧靡故吏三人題名在趺之右此

碑刻五玉三獸下有牛首蜀中漢碑如是者有柳敏
碑陰馮緄墓道雙排六玉碑又有單排六玉碑與此
凡四

隸續漢柳敏碑陰其上刻一禽若鳳其下則麟也中
牛首銜環兩旁凡六玉其右則瑁圭璧其左則琮璋
璜

沒字碑是邦雄傑碑之陰也與馮緄墓道一碑相類
非磨滅者朱雀在其上龜蛇在其下

碣

後漢書趙岐傳岐年三十餘有重疾卧蓐七年自慮奄忽乃為遺令教兄子曰大丈夫生世邈無箕山之操仕無伊呂之勲天不我與復何言哉可立一圓石於我墓前刻之曰漢有逸人姓趙名嘉有志無時命也奈何

岐初

名嘉

後漢書注方者謂之碑圓者謂之碣李斯所造

隋書七品以上立碣高四尺圭首方跌若隱淪道素孝

義著聞者雖無爵奏聽立碣

唐會要七品以上立碣若隱淪道素孝義著聞雖不仕亦立碣宋制六品以上則立碑八品以上則立碣

封演見聞記碣亦碑之類也周禮凡金玉錫石楬而璽之注云楬如今題署物漢書云庵寺前楬著其姓名注楬杙楬杙於庵處而書死者之姓名楬音楬然則物有標榜皆謂之楬郭景純江賦云義湄為泉陽之楬玉璽作東別之標是也其字本從木後人以石

為墓碣因變為碣說文云碣特立石也據此則從木從石兩體皆通

珊瑚鈎詩話碣者揭示操行而立之墓隧也

明集禮五品以上許用碑龜趺螭首六品以下許用碣方趺圓首

誌石

檀弓孔子之喪公西赤為志焉

注志謂章識疏章明志識

子張之

喪公明儀為志焉

方慤曰志記也書其禮而記之

南史裴子野傳子野葬湘東王為之墓誌銘陳于藏內
邵陵王又立墓誌于羨道羨道列誌自此始

南齊書有司奏大明故事太子妃玄宮中有石誌參議
墓銘不出禮典近宋元嘉中顏延之作王球石誌素族
無碑策故以紀德自爾以來王公以下咸共遵用儲妃
之重禮殊恒列既有哀策謂不須石誌從之

唐會要誌石唐制品官皆用宋制九品以下無之

封演見聞記古葬無石誌近代貴賤通用之齊太子

穆妃將葬立石誌王儉曰石誌不出禮經起元嘉中
顏延之為王球作石誌素族無名策故以紀行迹耳
遂相祖習儲妃之重禮絕常例既有哀策不煩石銘
儉所著喪禮云施石誌於壙裏禮無此制魏侍中繆
襲改葬父母墓下埋文原此旨將以千載之後陵谷
遷變欲後人有所聞知其人若無殊才異德者但紀
姓名歷官祖父姻媾而已若有德業則為銘文案儉
此說石誌宋齊以來有之矣齊時有發古冢得銘云

青州世子樂海女郎河東賈昊以為司馬越女嫁為荀晞子婦檢之果然東都殖業坊十字街有王戎墓隋代釀家穿傍作窖得銘曰晉司徒尚書令安豐侯王君銘有數百字然則古人葬者亦有石誌但不如今代貴賤通為之耳

馮鑑續事始案西京雜記前漢杜子夏臨終作文其死命刊石埋於墓前墓志恐因此始

司馬氏書儀誌石刻文云某官姓名

婦人云某姓名妻某封某氏某

州某縣人考諱某某官某氏某封

無官封者但云姓名或某氏

某年

月日終某年月日葬

大夫云娶某氏其人之女封某邑

子男某某官女

適某官某人若直下穿壙則置之便房若旁穿為壙則

置之壙門墓前更立小碑可高二三尺許大書曰某姓

名某更不書官

古人有大勲德勒銘鐘鼎藏之宗廟其葬則有豐碑以下棺耳秦漢以來始命

文士褒贊功德刻之于石亦謂之碑降自南朝復有銘誌埋之墓中使其人果大賢邪則名聞光昭衆所稱頌乃流今古不可掩蔽豈待碑誌始為人知若其不賢也乃以巧言麗辭強加飾采功侔望德比仲尼徒以譏笑其誰肯信碑猶立於墓道人得見之誌乃藏於壙中自非開發莫之睹也隋文帝子秦王俊薨府僚請立碑

帝曰欲名一卷史書足矣何用碑為徒與人作鎮石耳此實語也今既不能免俗其誌文但可直叙鄉里世家官簿始終而已季札墓前有後世稱孔子所篆云嗚呼有吳延陵季子之墓豈在多言然後人知其賢邪今但刺姓名於墓前他日人自知其賢愚耳

朱子家禮誌石用二片其一為蓋刺云某官某公之墓其一為底刺云某官某公諱某字某某州某縣人考諱某某官母某氏某封某年月日生歷官遷次某年月日終某年月日葬于某鄉某里某處娶某氏某人之女子男某某官女適某官某人婦人夫在則蓋刺云某官姓

名某封某氏之墓夫亡則云某官某公某封某氏其底
叙年若干適某氏因夫與子致封號葬之日以二石字
而相向鐵束而埋之

朱子語類問政和禮九品以下至庶人無誌溫公有
之今當何從朱子荅云誌石為久遠之計埋於土中
有何僭禮須在壙上二三尺縱遇畚鍤猶可得止勿
置壙中 陳淳安卿問曰某問誌石之制在士庶當
如何題溫公謂當書姓名恐所未安夫婦合葬者所

題又當何如朱子曰宋故進士

或云處士

某君夫人某氏

之墓

下畧記名字鄉里年
歲子孫及葬之年月

金石例墓誌納之墓中柩前平放其狀如方石斗二
底撮面平而不凹大小無定制上一斗於平面上大
字題某官某人墓誌銘曾見古墓中石誌制度如此
又記上一斗止寫某人墓誌不書銘字下一斗上作
小字書前一行刻云某官某人墓誌銘并引或言有
序或言并序後書序及銘刻畢以丹填之上下二斗

字並用丹填二斗相合四角以薄石片摺起摺石如錢大厚薄亦如之但要使二石實相厭著

錢希言戲瑕牧野

竹書紀年作毋野

有比干墓前有石銘題

隸云商大夫比干之墓所記唯此漢高祖孝文各為立碑延陵季子十字碑在鎮江人謂孔子書文曰有吳延陵季子之墓案古法帖上云嗚呼有吳君子六字而已若延陵之墓四字疑是後人妄增除之字外三字是漢人古篆不與前六字合東都殖業坊十字

街有王戎墓隋代釀家穿其傍作窖得銘曰晉司徒
尚書令安豐侯王君銘漢西都時南宮寢殿內有醇
儒王史威長葬銘銘曰明明哲士知存知亡崇隴原
塹非寧非康不封不樹作靈垂光厥銘何依王史威
長杜子夏葬長安北四里臨終作文曰魏郡杜鄴立
志忠款犬馬未陳奄先草露骨肉歸於后土魂氣無
所不之何必故丘然後即化封於長安北郭此焉宴
息及死命刊石埋於墓側東漢趙嘉即趙岐與兄子

書大丈夫遯無箕山之操仕無伊呂之勲天不我與
復何言哉可立一圓石於吾墓門側刻之曰漢有逸
民姓趙名嘉有志無時命也奈何吳郡陸績豫知亡
日乃為辭曰有漢志士吳郡陸績幼敦詩書長玩禮
易受命南征邁疾遇厄遭命不幸嗚呼悲隔唐傳奕
武德中為太史令一病不問醫自誌曰傳奕青山白
雲人也以醉死古人墓文之簡只十餘字何當不傳
今人則連篇累牘不諛地下則諛地上耳買菜求益

嚴光所以深歎歟案洛陽伽藍記載後魏隱士趙逸
荅好事者語云生時中庸之人耳及其死也碑文墓
誌莫不窮天地之德生民之能事為君共堯舜連衡
為臣與伊呂等迹牧民之官浮虎慕其清塵執法之
吏埋輪謝其鯁直所謂生為盜跖死為夷齊妄言傷
正華詞損實當時作文之士慚愧此言據此則南北
朝時已然不獨唐時諛墓而已蔡中郎云平生作碑
文唯郭有道一片無媿則西京時已有此風邪予嘗

見元人趙承旨孟頫集中所載其自撰父母及祖母墓誌僅叙生卒爵里而已並不書事至於尚書故實所載東晉謝太傅碑但著貞珉初無文字蓋重難著述之意此等識見高出千古

近世凡墓誌銘及碑碣之類必加書撰人并篆蓋題額者於前至往往假顯者之名以誇於人此甚可笑歐陽公與尹材帖云墓銘刻石不必留官銜題目及撰人書人刻字人姓名晉人以前皆不著撰人姓名

此古人有深意況久遠自知歐公此言豈無所見而云邪予觀古之碑志有止書撰人姓名而不著書人者蓋以當時之人皆能書或多撰者之所書也有止著書人姓名而不著撰人者蓋文或者之所為也有止書某官某人於旁而不著書撰者蓋書撰或即其人也予近得唐人二志石其一開元二十八年周府君志其一太和二年顧府君志皆不著書撰人名可見在唐猶然而不特晉以前也又嘗於城南草間得

宋時墓石一方乃子誌父其諱處字皆畧草與志文之字不倫後書曰某人書諱字亦如之乃知諱為其人親書此又可見古人作事之不苟矣

呂坤四禮疑誌於石示來世也文其辭篆其姓名合而銅之以鐵埋諸地中將誰示乎不若誌諸碣碣者揭也一抔之封無所表識百年之後子孫且不識祖考況在他入故詳具其家世以誌之今用方石二面一而楷書為文文既工一面篆書為題篆難辨字字相對以鐵束之埋於墓頭三四尺本注云慮異時誤為人所動見石而知其姓名庶能掩之謬哉其為說也石在墓頭發及石則見棺也半矣兩石內向重重鐵束誰復從容為汝鉗鉗即或開之豈皆通文辨篆人邪即知其名姓死者之德能致聞者之重否即為

掩之能肯復東此石否石既不東能必墓不再動否此
說大可笑也不如題姓名于碣面詳家世於碣陰有
功德者表諸神道使有目者皆得見之免致誤
動之尤愈乎程大中誌石砌于壁間有何不可
顧起元說畧齊太子穆妃將葬立石誌王儉曰石誌
不出禮經起顏延之為王球作墓誌以其素族無名
諫故也案博物誌漢西都時南宮寢殿內有王史威
長死葬銘又孔子之喪公西赤為識馬子張之喪公
明儀為識馬說者謂識誌也又闔閭墓中石銘莊子
衛靈公沙丘石椁銘今古帖有比干墓銘文心雕龍
云飛廉有石椁之銘據此則非始於延之也
陳龍正家矩誌石專防發掘須令易見若準家禮合
字於背外用鐵束是掩之也雖掘者見石何緣知為
某冢而遽歇乎乎冀有斷鐵開石諦察詳觀抑又難
矣宜仰字於面但以輓覆之離壙前數尺淺埋之蓋

子葬母自刻跪像埋之墓前後遇掘者遂知為孟母墓聖賢蓋唯欲人之早見之也

權厝誌

墓銘舉例柳宗元有故永州刺史崔君權厝誌又有故連州負外司馬凌君權厝誌又有亡姑渭南縣尉陳君夫人權厝誌權厝有誌又一例也

歸祔誌

墓銘舉例柳宗元先太夫人河東縣太君歸祔誌無銘詩不忍詩而銘之也又一例也題書歸祔又一例

也

遷祔誌

金石例柳子厚有叔妣陸氏夫人遷祔誌

誌殯

墓銘舉例柳宗元誌從父弟宗直殯誌其人殯又一例也

墳記

墓銘舉例柳宗元有韋夫人墳記云祔而不合大葬

未利以俟蓋實權厝誌也題書墳記又一例也

墓記

墓銘舉例朱文公有劉樞密墓記又有范直閣墓記
題書墓記同柳文韋夫人墳記例也

壙記

墓銘舉例朱文公有知縣何公壙記又有亡嗣子壙
記題書壙記同韓文女孥壙銘例也

墓輓文

漢隸字源漢謝君墓輓文元和三年作

墓輓記

范成大吳郡志江纂墓江適子也木瀆孫起卿頃於
天平山下地名上沙獲墓碑乃以大方輓刻之字畫
俱存與石無異起卿為賦詩家有古塚碑近自田家
獲藏之五六年未甚見省錄古苔侵文理封結殆莫
識偶然嗟其窮一一為磨剔始若漫無文細尋適可
讀文云晉江纂長夜垂茲刻貞石殊不用塊然但延

塋合葬無別銘背面書反覆一字不涉華本枝記明

白二父遂兼書於道乃宗適

誌云養父諱本父適也

考諸晉史

篇真是小出入字畫亦嶮勁然不類鐫斷漢魏尚豐

碑此獨何福迫豈時丁喪亂不暇如品式於時義熙

季歲次實庚戌五胡剖中原典午竄南極苟簡理宜

爾寧詒不孝責審訂既昭然疑去喜自適厯年七百

餘瞥爾駒過隙名節苟不傳埃化先瓦石置茲當眼

前用代銘几席

墓銘舉例柳宗元有小姪女墓輒記實銘詩也而無序題書墓輒記又一例也

吾衍學古編宋開封張堯夫墓銘以其葬之速也不能刻石乃得金谷方輒命太原王顧以丹為隸書納於壙中

穿中記

漢隸字源張賓公妻穿中二柱文建初二年立在眉州碧雞巖紹興丁丑武陽城東彭山之上掘得之

墓識

墓銘舉例宋陳瓘有尚書曾公墓識叙所歷官而不書行治無他辭唯結以某官陳某叙次一語題書墓識又一例也

墓版

墓銘舉例柳宗元有故叔父殿中侍御史府君墓版其實表也

窆石

圖經禹葬于會稽取石為窆

會稽志禹廟窆石遺字直寶文閣王順伯復齋金石

錄定為漢刻

趙明誠金石錄漢窆石銘永建元年五月

蓋石

周密癸辛雜識趙松雪云北方多唐以前古冢所謂墓誌者皆在墓中正方而上有蓋蓋豐下殺上上書某朝某官某人墓誌此所謂書蓋者蓋底兩間周鐵

局局之後人立碑於墓道之上篆額止謂之額後記
為蓋非也今世歲月志乃其家子孫為之非所謂墓
碑也古者初無歲月志之石

墓銘舉例柳宗元有亡姊崔氏夫人墓誌蓋石文
云敢附碑陰之義假蓋石以書其辭

讀禮通考卷第九十八

欽定四庫全書

經部

讀禮通考卷一百一十九至

詳校官監察御史臣劉湄

給事中臣溫常綬覆勘

總校官編修臣王燕緒

校對官編修臣沈清藻

謄錄監生臣楊其梓

欽定四庫全書

讀禮通考卷九十九

刑部尚書徐乾學撰

喪具五

墓銘

祭統銘者自名也自名以稱揚其先祖之美而明著之
後世者也為先祖者莫不有美焉莫不有惡焉銘之義
稱美而不稱惡此孝子孝孫之心也

乾學案祭統所言實鼎銘非墓銘也但後世

作誌銘者無不援此以為據故節錄其文以見銘文之所本

荀子銘誅繫世敬傳其名也

注繫世謂書其傳襲若今之譜牒也所以敬傳

其名於後世

乾學案繫世即周禮小史之職所謂奠繫世者是

釋名銘名也述其功美使可稱名也

舊唐書令狐楚謂其子緒綯曰吾生無益於人勿請謚

號葬日勿請鼓吹唯以布車一乘餘勿加飾銘志但志
宗門秉筆者無擇高位

曾鞏寄歐陽舍人書夫銘誌之著於世義近於史而
亦有與史異者蓋史之於善惡無所不書而銘者蓋
古之人有功德材行志義之美者懼後世之不知則
必銘而見之或納於廟或存於墓一也苟其人之惡
則於銘乎何有此其所以與史異也其辭之作所以
使死者毋有所憾生者得致其嚴而善人喜於見傳

則勇於自立惡人無有所紀則已媿而懼至於通材
達識義烈節士嘉言善狀皆見於篇則足為後法警
勸之道非近乎史其將安近及世之哀人之子孫者
一欲褒揚其親而不本乎理故雖惡人皆務勒銘以
誇後世立言者既莫之拒而不為又以其子孫之所
請也書其惡焉則人情之所不得於是乎銘始不實
後之作銘者當觀其人苟託之非人則書之非公與
是則不足以行世而傳後故千百年來公卿大夫至

於里巷之士莫不有銘而傳者蓋少其故非他託之
非人書之非公與是故也

王安石荅錢公輔書比蒙以銘文見屬足下於世為
聞人力足以得顯者銘父母以屬於不腆之文似其
意非苟然故輒為之而不辭不圖乃猶未副所欲欲
有所增損鄙文自有意義不可改也宜以見還而求
能如足下意者為之耳家廟以今法準之恐足下未
得立也足下雖多聞要與識者講之如得甲科為通

判通判之署有池臺竹林之勝此何足以為太夫人之榮而必欲書之乎貴為天子富有天下苟不能行道適足以為父母之羞况一甲科通判苟麤知為辭賦雖市井小人皆可以得之何足道哉何足道哉故銘以謂閭巷之士以為太夫人榮明天下有識者不以置悲歡榮辱於其心也太夫人能異於閭巷之士而與天下有識同此其所以為賢而宜銘者也至於諸孫亦不足列孰有五子而無七孫者乎七孫業之

有可道固不宜畧若皆兒童賢不肖未可知列之於
義何當也諸不具道計足下當與有識者講之南去
愈遠君子唯順愛自重

乾學案介甫此書可見古人叙事簡嚴之法
故錄之

容齋隨筆作文受謝自晉以來有之至唐始盛李邕
傳邕尤長碑頌中朝衣冠及天下寺觀多齋持金帛
往求其文前後所製凡數百首受納饋遺亦至鉅萬

時議以為自古鬻文獲財未有如邕者韓愈撰淮西碑憲宗以石本賜韓弘弘寄絹五百匹作王用碑用男寄鞍馬并白玉帶劉叉持愈金數斤去曰此諛墓中人得耳不若與劉君為壽愈不能止劉禹錫祭愈文云公鼎侯碑誌隧表阡一字之價輦金如山穆宗詔蕭俛撰成德王士真碑俛辭曰王承宗事無可書又撰進之後例得貶遣若黽勉受之則非平生之志帝從其請文宗時長安中爭為碑誌若市買然大官

卒其門如市至有喧競爭致不由喪家裴均之子持
萬緡詣韋貫之求銘貫之曰吾寧餓死豈忍為此哉
白居易修香山寺記曰予與元微之定交於生死之
間微之將薨以墓誌文見託既而元氏之老狀其臧
獲輿馬綾帛洎銀鞍玉帶之物價當六七十萬為謝
文之贄予念平生分贄不當納往反再三訖不得已
回施茲寺凡此利益功德應歸微之本朝此風猶存
唯東坡公於天下未嘗銘墓獨銘五人皆盛德故謂

富韓公司馬公趙清獻公范蜀公張文定公也此外
趙康靖公滕元發二銘乃代文定所為者在翰林日
詔撰同知樞密院趙瞻神道碑亦辭不作曾子開與
彭器資為執友彭之亡曾公作銘彭之子以金帶纁
帛為謝却之至再曰此文本以盡朋友之義若以貨
見授非足下所以事父執之道也彭子惶懼而止

朱子語類朱子喪長子魂輜柩止用紫蓋盡去繁文
銘石二片各長四尺闊二尺許止刻姓名歲月居里

二面相合以鐵束之置於壙上

金石例漢碑有銘辭亦有無者今亦然

張所望閱耕餘錄杜子夏臨終作文及死命刻石埋于墓側此後世碑銘之始

何孟春餘冬序錄墓銘或謂晉以前無有顏延年始為其制案吳志凌統卒孫權使張承作銘誄則三國時事也又案張華博物志漢西都時南宮寢殿內有醇儒王史威長死葬銘曰明明哲士知存知亡崇隴

原塋非寧非康不封不樹作靈垂光厥銘何依王史
威長葬有銘久矣 歐陽永叔為尹師魯作墓銘與
尹材書曰刻石時首尾更不要留官銜題目及撰人
書人刻字人等姓名晉以前碑皆不著撰人姓名此
古人有深意久遠自知篆蓋祇著尹師魯墓四字其
告之之詳如此近世士大夫有不肯與人銘墓者問
之云吾不欲以生人姓名埋地下伴死人耳彼容未
見歐公不著姓名之說也

李長蘅曰銘者名也所以名其為人使其人精神顏面傳於後世也韓子之銘王評事也叙其文書銜袖之事銘李侍郎也叙其篤信方藥之語千百世而下讀其文者談笑誣誣如或見之今之為辭者緣飾名行鋪陳盛美欺生諛死貸口借面雖其大書深刻碑版照耀而其中固枵然無所有則亦何怪其速朽哉乾學案李長蘅荅徐巨源書云古人合葬題不書婦今曰暨配某者空同以後不典之辭

也及見金石文字記有澤王府主簿梁府君
并夫人唐氏墓誌銘四品孫義陽朱賓撰唐
武后垂拱四年十一月又滎陽鄭府君夫人
博陵崔氏合祔墓誌銘秦貫撰宣宗大中十
二年十二月據此則古人亦有書婦者矣鄭
府君志係拓本予曾見之梁府君志近出終
南山樛梓谷土中蓋當時未及見耳

壙銘

金石例韓退之有女挈壙銘

埋銘

墓銘舉例朱子有女已埋銘無序同韓文試大理評事胡君銘例題書埋銘又一例也

陳瓘有侍郎鄒公埋銘同朱文公女已埋銘例彼但銘而不序此序而無銘又一例也

石槨銘

博物志衛靈公葬得石槨銘不達箕子靈公奪我里

漢滕公薨求葬東都門外公卿送喪駟馬不行跼
地悲鳴跑蹄下地得石有銘曰佳城鬱鬱三千年見
白日吁嗟滕公居此室遂葬焉

墓銘舉例宋歐陽修有母鄭夫人石槨銘石槨有銘
又一例也書作槨之日而系以銘又一例也

石塔銘

文苑英華蘇頌故悼王石塔銘王即開元神武皇帝
第九愛子也二歲而未及周葬於萬安山之東南嶺

壙唯五尺棺不三尺壘石塔一丈於其上不雕不礱

墓表

漢隸字源謁者景君墓表元初五年立在濟州石磨
滅不見名字東漢墓闕自路都尉始為文則自景君
始文章緣起云墓碑自晉始非也

朱子家禮墳高四尺立小石碑於其前亦高四尺跌高

尺許

案孔子防墓之封其崇四尺故取以為法焉司馬公說別立小碑但須闊尺以上其厚居三之二圭

首而刺其面如誌之蓋乃畧述其世系名字行實而刺於其左轉其後右而周焉婦人則俟夫葬乃立面如夫

亡誌蓋
之例云

表墓石立於墓前

就地理定上題云某人之墓無
文詞墓雖無碑者亦當立此石

殯表

墓銘舉例韓退之有施州房使君鄭夫人殯表實銘
詩也銘宜詩而墓銘有用文者表宜文而此表乃因
詩焉皆變例也殯而有表又一例也

石像

吳寬家藏集耶律丞相墓在甕山下前有石像鬚分

三繚其長過膝

石函

隸續魏甄皇后識坐板函上刻文昭皇后識坐板函
八字紹聖丙子年鄴民耕地得一綠石匣廣八寸有
半長倍之厚三之一鹿頂笏頭蓋其上有此八字魏
文帝甄后神坐前之物也

吉金貞石志應州馬神祠前施食臺石刻八卦於旁
又書二十八宿字上有篆文曰唐故汾州刺史朱邪

府君墓誌銘蓋沙陀之俗死焚其骨盛以石函此其蓋也

石臺

倦游錄法華人發古墓得碑有刻字曰晉升平四年三月四日太學博士陳留郡雍丘縣都鄉州周闡字道舒妻活晉尋陽太守譙國龍岡縣桓逸字茂長小女父晉安成太守鷹揚男諱蟠字永時背鵠成文案此周闡之妻桓逸之女墓也父晉安成太守鷹揚男

諱蟠者蓋闡之父故獨稱諱但不知妻名活何義字
畫極分明無訛其中無他物唯得銅銚一二足螭柄
面闊四寸餘深半之制作不甚工野人求售適得之
云尚有一石臺高二尺許有花文先為漢南人取去

石室

水經注鉅野黃水南有荊州刺史李剛墓剛字叔毅
山陽高平人熹平元年卒見其碑有石闕祠堂石室
三間椽架高丈餘鏤石作椽瓦屋施鴟尾造方井側

荷梁柱四壁隱起雕刻為君臣官屬龜龍麟鳳之文
飛禽走獸之像作制工麗不甚傷毀

漢隸字源太守張景題字光和六年立在高联石室
梁上博士題字在高联石室中弘農太守張君題字
在高联石室中

石壁

夢溪筆談濟州金鄉縣發一古墓乃漢大司徒朱鮪
墓石壁皆刻人物祭器樂架之類

石祠

水經注金鄉有司隸校尉魯恭冢冢前石祠石廟四壁青石隱起自書契以來忠臣孝子貞婦孔子及七十二弟子形像像邊皆刻石記之又有石牀長八尺磨瑩鮮明叩之聲聞遠近

石柱

訪碑錄北海縣東二十里漢博士逢汾墳前有雙石柱篆書

隋書梁天監六年申明葬制凡墓不得造石人獸碑唯聽作石柱記名位而已

石闕

水經注邵縣有黃家墓墓前雙石闕雕制甚工俗謂之黃公石闕黃公名尚漢司徒

譙城南有曹嵩冢冢北有碑廟北有二石闕雙峙高一丈六尺棖櫨及柱皆雕鏤雲矩上復思已碎

隸釋東都自路都尉始見墓闕蓋阡表銘壙之濫觴

也有文而傳於今則自謁者景君始中皇帝賻三字
特書於誌文之上齊葬穆妃議立石誌王儉以為非
禮經所出元嘉中顏延之輩為之遂相祖述任昉作
文章緣起又云墓碑自晉始予考酈氏水經注所載
漢刻已不少後魏與齊梁時相先後也豈碑碣多在
北方而南人未之見乎郭林宗傳云林宗既葬同志
者立碑蔡邕為其文謂盧植曰吾為碑銘多矣唯郭
有道無媿色史稱王儉晉宋以來故事儀典諳憶無

遺每博議引證先儒無能異者范書所載豈不知之
今漢人墓刻猶存數十百碑其云始於晉宋非也

隸續會稽東部都尉路君闕漢明帝永平八年造東
都冢墓間石刻傳於後世者自此始

豫州刺史路君二闕前闕七行二十七字書其所歷
豫州刺史至徵試博士凡八官後闕亦七行二十一
字云會稽東部路君闕其次書造闕年月日永平之
八年也字畫兼用篆體前闕人物之後小字一行却

是隸文豫州前後各一人執仗負劍嚮字立東部之前亦一人執仗負劍又有一人正面立腰下垂佩兩手各有所執未亦一人執仗負劍而其前又有一人側面嚮字立手中亦有所執蓋是墓前雙闕如王稚子高貫方之類但一闕無姓名此其異爾

金石錄楊宗墓闕銘在蜀中凡十六大字云漢故益州太守楊府君諱宗字德仲墓闕

隸釋漢處士金恭闕石圭首甚銳其上刺三足鳥其

次橫刺此數字其下有一人執扇而乘馬兩旁有螭
銜環

趙相雍勸闕碑題漢故趙國相雍府君之闕十隸字
今在梓潼漢代銘墓所叙人之上世未嘗書其名諱
此碑載雍君父祖諸兄名又有字其官秩甚詳而雍
君事迹甚畧趙氏以此為碑而謂前十字為闕予考
其文水關舊墓謂九江君也右校既易地造壘此之
諸冢皆同兆域趙相故吏并志其事蓋題闕之文非

墓道之碑與丘中之銘也

雒陽令王稚子二闕墓前之雙石闕也其上各刻車馬之狀一則二人乘馬一則二人乘車

隸續不其令董君闕所畫者子孫展墓之狀有僕馬休於松楸之下

漢隸字源鄉令景君闕銘元和四年立在濟州集古錄作景君石槨銘

石筍

華陽國志蜀有五丁力士能移山舉萬鈞每王薨輒立大石長三丈重千鈞為墓志今石筍是也

石鏡

華陽國志武都有一丈夫化為女子蜀王納為妃無幾物故蜀王哀之乃遣五丁之武都擔土為妃作冢蓋地數畝高七丈上有石鏡其親埋作冢者皆立方石以志其墓

華表

續齊諧記張華為司空於時燕昭王墓前有一斑狸
化為書生欲詣張公過問墓前華表曰以我才貌可
得見司空邪華表曰子之妙解無為不可但張公制
度恐難籠絡出不遇辱殆不得返非但喪子千年之
質亦當深誤老表狸不從遂見華見其容止風流雅
重之於是論及文章聲實華未嘗勝次復商畧三史
探貫百氏包十聖洞三才華無不應聲屈滯乃歎曰
明公乃尊賢容衆嘉善矜不能奈何憎人學問墨子

兼愛其善是也言卒便退華已使人防門不得出既而又問華曰公門置兵甲闌錡當是疑僕也恐天下之人卷舌而不談知謀之士望門而不進深為明公惜之華不荅而使人防禦甚嚴豐城令雷煥博物士也謂華曰聞魅鬼忌所別者數百年物耳千年老精不復能別唯千年枯木照之則形見昭王墓前華表已當千年使人伐之至聞華表言曰老狸不自知果誤我事於華表穴中得青衣小兒長二尺餘使還未

至洛陽而變成枯木然以照之書生乃是一斑狸茂
先歎曰此二物不值我千年不復可得

搜神後記丁令威本遼東人學道於靈虛山後化鶴
歸遼集城門華表柱時有少年舉弓欲射之鶴乃飛
徘徊空中而言曰有鳥有鳥丁令威去家千年今始
歸城郭如故人民非何不學仙冢累累遂高上冲天

瓠甃壇

後漢書地理志注仲尼墓在魯城北便門之外泗水

上墓前甓甃為祠壇方六尺與地平

券臺

清異錄葬家聽術士說例用朱書鐵券若人家契帖標四界及主名意謂亡者居室之執守不知爭地者誰邪瘞墓前甃石若甃表之面方長高不登三尺號

曰券臺

金九臯抱甕集墓前地名明堂一名券臺朱子語錄云不曉所以後見唐人文集中言某朝詔改為券臺案今地理書有券臺之說券契也埋地契處曰券臺地契用甃石為之上書財若干緡為死者用財葬于

此山神土龍不得爭競貧無力者
遇祭祀則以藉尊俎謂之土筵席

墓圖

古金石例墓圖作方石碑先畫墓圖有作圖象者內

畫墓樣各標其穴某人其石缺之祭堂壁上無祭堂

則嵌園牆上

韓魏公父墓圖今有此石歲久卧之牆外

宗支圖碣二一埋

中宮之外一立中宮之上太原以墳塋中心為宅神

亦中宮之義也

祭堂瓦花頭皆寫云某氏千秋墓輒亦然南陽宗資墓前人有得古花頭

瓦其花頭刻云宗氏千秋今石刻在中
州刺史宅凡祭堂二于中宮左右建也

學堂 繡堂

古金石例南京赤倉高太皇祖塋作昭穆葬小兒子
死共葬一處謂之學堂小女共葬一處謂之繡堂

石刻畫像禮器

後漢書趙岐傳岐自為壽藏圖季札子產晏嬰叔向四
像居賓位又自畫其像居主位皆為讚頌

隸釋武梁祠堂畫像為石六所畫古帝王忠臣義士
孝子賢婦各以小字識其旁合百六十有二人又有

鳥獸草木車蓋器皿屋宇之屬甚衆

隸續成王周公畫像有標題者六皆偏而不正唯成王周公二榜不漫滅其間張幕設案有總角垂褰而中立者成王也冕而跪於東者曰周公則西者當是召公漢碑有龍虎者隨其文觀之則先龍後虎蓋以碑之所向為左右也立於二公之後者六人其西三人則無標題皆有所執如弓矢之屬一馬在其後此碑所列諸臣翼如也與武梁朱浮畫像法式皆異雍

丘令及此皆洛陽朱敷儒希真所藏者朱云齊魯間漢公卿墓中物亦不詳其主名

雍丘令殘畫碑人馬之形貌不類駕車各以一馬凡車之上有蓋乘車者之後有一人其御也唯第七車無蓋而御者執斧其次則導者二人各執其物有如箭者次二人乘馬次導者又二人然後至所謂雍丘令之車次二人乘馬從之復有一車唯見其馬與車之半輪餘則闕矣乃是寫其平生車騎容納之幽窅

者亦塗車芻靈之意也

漢馮緄墓六玉碑二其上有烏三足狐九尾其下則
二驢有一人跨其右者最下一牛首蜀人謂之雙排
六玉碑又一碑與六玉碑同一石在馮緄墓道中蜀
人謂之六物碑其上朱雀而下玄武其中沒字非漫
滅也

馮緄墓單排六玉碑上下有朱雀玄武蜀人既以前
碑為雙排而謂此為單排恐亦是馮緄墓道中物

隸釋麒麟鳳凰碑凡二石其像高二尺餘又有山陽
麟鳳碑二物共一石其像小於此碑像下有贊碑陰
有記云永建元年山陽太守河內孫君新刻瑞像最
後有銘辭皆篆文也

石人

風俗通方相氏葬日入壙毆罔象罔象好食死人肝
腦人臣不能備方相乃立其象於墓側

山東通志曲阜舊縣南八里漢魯恭王子孫皆葬於

此大墓二十餘石獸四石人三胸臆間篆刻有曰漢樂安太守廡君橐冢者有曰府門之卒者餘剝落不可識

漢書顏師古注霍去病冢在茂陵旁冢上有堅石冢前有石人馬者是也

唐會要上欲闡揚先帝徽烈乃令匠人琢石寫諸蕃君長十四人列於陵司馬北門內

宋次道長安志諸蕃君長貞觀中擒伏歸和者琢石

肖形狀而刻其官名凡十四人

帝京景物畧耶律楚材墓前廢祠石像尚存一翁仲
立未仆天啓七年夏夜有螢十百集翁仲首土人望
見夜譁曰石人眼光也質明共蹈而碎之

唐會要石人石獸之類三品以上用六五品以上用四
金石例金制諸葬儀一品官石人四事石虎石羊石
柱各二事二品三品減石人二事四品五品又減石
柱二事

明太祖實錄功臣沒後封王石人四文武各二一品石人二文武各一二品同

石獸

風俗通罔象畏虎與柏故頂上栽柏路前立虎

封演見聞記秦漢以來帝王陵前有石麒麟石辟邪石馬之屬人臣墓前有石羊石虎石人石柱之屬皆所以表飾故壟如生前之儀衛耳國朝因山為陵太宗喪九駿山門前亦列石馬陵後司馬門內又有蕃

首會侍軒禁者一十四人石像皆刻其官名後漢太尉楊震葬日有大鳥之祥因立石鳥像於墓風俗通云周禮方相氏葬日入壙毆罔象罔象好食亡者肝腦人家不能常令方相立於側而罔兩畏虎與柏故墓前立虎或說秦穆公時陳倉人掘地有物若羊將獻之道逢二童子謂曰此名為蝮常在地中食死人腦若殺之以柏東南枝捶其首由是墓側皆樹柏此上兩說各異未詳孰是案禮經云天子墳高三雉諸

侯半之大夫八尺士四尺天子樹松諸侯樹柏大夫
樹楊士樹榆說文云天子樹松諸侯樹柏大夫樹
楊案禮經古之葬者不封不樹後代封墓而又樹之
左傳云爾墓之木拱矣又曰樹吾墓檟仲尼卒弟子
各自他方持其異木樹之於墓蓋殷周以來墓樹有
尊卑之制不必專以罔象之故也風俗通又云汝南
彭氏墓頭立石人石獸田宅老母到市買數片餌暑
熱行疲息石人下遺一片餌客來見道行人因謂之

云石人能愈病人來謝汝轉相告語頭痛者摩石人
腹病者多自愈因言得其福乃號曰石賢士輜輶
擊帳帷絳天絲竹之音聞數十里數年稍自休歇樵
子云石門誌墓古之道邪荅曰古不崇墓況損人功
而為觀乎非古也盧思道西征記云新鄉城西有漢
桂陽太守趙越墓墓北有碑碑有石柱東南有亭以
石柱為名然墓前石人石獸之屬自漢代而有之矣
孔叢子夫子墓塋方一里在魯城北六里泗水上諸

孔丘封五十餘所有銘碑三所獸碣具存

西京雜記五柞宮西有青梧觀觀前有三梧桐樹下有石麒麟二枚刊其脅為文字是秦始皇酈山墓上物也頭高一丈三尺東邊者前左脚折折處亦如血父老謂其有神

金石例霍去病墓象祁連山立石人馬然則墓前之立石人石柱羊虎之類皆起於漢也唐王建北邙行山頭澗底石漸希盡向墳前作羊虎

水經注獲嘉縣西有漢桂陽太守趙越墓冢北有碑
碑東又有一碑碑北有石柱石牛羊虎皆碎淪毀莫
記

集古錄漢宗資墓天祿辟邪字在墓前石獸膊上一
曰天祿一曰辟邪篆書墓在今鄧州南陽界中

漢隸字源司空宗俱碑熹平二年立在鄧州金石云
後漢書宗均族子意意孫俱靈帝時為司空嘗得宗
資墓獸刻字知均以下皆當作宗列傳轉寫為宗誤

也

金石錄漢趙相劉衡墓在今齊州歷城縣界中古平陵城旁墓前有石獸制作甚工

漢隸字源交趾刺史石羊字在郴州止五字刻於墓道石羊膊上

金石錄州輔墓石獸膊字鄺道元注水經云州君墓有兩石獸已淪沒人有掘出一獸猶不全破甚高壯頭去地丈許制作甚工左膊上刻作辟邪字予初得

州君墓碑又覽水經所載意此字猶存會故人董之
明守官汝潁間因託訪求之踰年持以見寄其一辟
邪道元所見也其一乃天祿字差大皆完好可喜之
明又云天祿近歲為邨民所毀辟邪雖存然字畫已
殘闕難辨此蓋十年前邑人所藏今不可復得矣
水經注過水逕大扶城西城之東北悉諸袁舊墓碑
字傾低羊虎碎折

六朝事迹梁吳平忠侯蕭景墓在花林之北有石麒麟

麟二 梁始興王蕭憺墓在清風鄉黃城邨有石麒麟四 梁安成王蕭秀墓在甘家巷有石麒麟二 金石錄初唐太宗以文德皇后之葬自為文刻石於昭陵又琢石象平生征伐所乘六馬為贊刻之皆歐陽詢八分書世或以為殷仲容書非是

唐會要昭陵刻石為先帝常所乘破敵馬六匹於闕下安祿山事迹潼關之戰昭陵奏是日靈宮前石人馬汗流

明太祖實錄功臣沒後封王石虎羊馬石望柱各二一
品至四品石虎羊馬石望柱各二五品石羊馬石望柱
各二

讀禮通考卷九十九